

REGIONAL NEWS UNIT  
ALL INDIA RADIO, AGARTALA  
Date: 22-06-2024  
Time: 07:55-08:05 PM Hrs  
BENGALI EVENING BULLETIN

---

Headlines :

- (১) ভারত ও বাংলাদেশ আজ বিভিন্ন ক্ষেত্রে চুক্তি বিনিময় করেছে এবং একাধিক সমঝোতা স্মারক নবায়ন করেছে ।
- (২) কেন্দ্রীয় শিক্ষা মন্ত্রক সর্বভারতীয় স্তরে গুরুত্বপূর্ণ পরীক্ষাগুলিতে স্বচ্ছ, সুষ্ঠু ও নিরপেক্ষ পরিচালনা নিশ্চিত করতে উচ্চ পর্যায়ের বিশেষজ্ঞ কমিটি গঠন করেছে ।
- (৩) জমি সংক্রান্ত সমস্যা নিষ্পত্তির জন্য পশ্চিম জেলা শাসকের কার্যালয়ে এখন থেকে প্রতি শনি ও রবিবার রাজস্ব আদালত বসবে ।
- (৪) একদিনের বিরতির পর মহিলাদের ঘরোয়া ফুটবল লিগের খেলা আজ ফের অনুষ্ঠিত হয় ।

\*\*\*\*\*

**Sheikh Hasina :**

প্রধানমন্ত্রী নরেন্দ্র মোদী আজ নতুন দিল্লিতে রাষ্ট্রপতি ভবনে বাংলাদেশের প্রধানমন্ত্রী শেখ হাসিনাকে উষ্ণ অভ্যর্থনা জানিয়েছেন। সেখানে শেখ হাসিনাকে গার্ড অব অনার দেওয়া হয়।

রাষ্ট্রপতি ভবনের এই কর্মসূচি শেষে প্রধানমন্ত্রী শেখ হাসিনা জাতির পিতা মহাত্মা গান্ধীর প্রতি শ্রদ্ধা জানাতে রাজঘাটে যান। সেখানে তিনি মহাত্মা গান্ধীর সমাধিসৌধে পুষ্পস্তবক অর্পণ করেন।

ভারত ও বাংলাদেশ আজ বিভিন্ন ক্ষেত্রে চুক্তি বিনিময় করেছে এবং একাধিক সমঝোতা স্মারক নবায়ন করেছে। চুক্তিগুলোর মধ্যে রয়েছে ডিজিটাল ও সবুজ অংশীদারিত্ব, সামুদ্রিক সহযোগিতা, অর্থনীতি, স্বাস্থ্য ও চিকিৎসা, মহাকাশ সহযোগিতা, রেল যোগাযোগ, সমুদ্রবিদ্যা, দুর্যোগ ব্যবস্থাপনা এবং মৎস্য সম্পদ। নতুন দিল্লির হায়দ্রাবাদ হাউসে প্রধানমন্ত্রী নরেন্দ্র মোদি এবং সফররত বাংলাদেশি প্রধানমন্ত্রী শেখ হাসিনার মধ্যে দ্বিপাক্ষিক আলোচনার পর চুক্তিগুলো বিনিময় হয়। এরপর এক যৌথ সাংবাদিক সম্মেলনে প্রধানমন্ত্রী নরেন্দ্র মোদী বলেছেন, ভারত চিকিৎসার প্রয়োজনে বাংলাদেশের মানুষের জন্য ই-মেডিকেল ভিসা সুবিধা চালু করবে। তিনি আরও জানান, রংপুরে একটি নতুন সহকারী হাইকমিশন খোলারও সিদ্ধান্ত নেওয়া হয়েছে। বাংলাদেশের প্রধানমন্ত্রী শেখ হাসিনা বলেন, "ভারত আমাদের সবচেয়ে গুরুত্বপূর্ণ প্রতিবেশী এবং বিশ্বস্ত বন্ধু। তিনি প্রধানমন্ত্রী নরেন্দ্র মোদীকে বাংলাদেশ সফরের জন্য আমন্ত্রণ জানান।

\*\*\*\*\*

**Rail Garib Rath :**

আগরতলা-কলকাতার মধ্যে গরিব রথ এক্সপ্রেসটি আগামী তেসরা জুলাই থেকে চলাচল শুরু হবে। উভয়দিকে সপ্তাহে একদিন

চলবে এই গরিব রথ। প্রতি সোমবার কলকাতা থেকে রাত ৯টা চল্লিশ মিনিটে আগরতলার উদ্দেশ্যে যাত্রা করবে। আবার প্রতি বুধবার সকাল ৭টা ৩৫ মিনিটে আগরতলা থেকে কলকাতার উদ্দেশ্যে যাত্রা করবে। গরিব রথ পুরোটাই বাতানুকুল বলে জানিয়েছেন স্টেশন মাস্টার চন্দ্র মোহন সাহু।

\*\*\*\*\*

**Examination-Committee :**

কেন্দ্রীয় শিক্ষা মন্ত্রক সর্বভারতীয় স্তরে গুরুত্বপূর্ণ পরীক্ষাগুলিতে স্বচ্ছ, সুষ্ঠু ও নিরপেক্ষ পরিচালনা নিশ্চিত করতে উচ্চ পর্যায়ের বিশেষজ্ঞ কমিটি গঠন করেছে।

এই কমিটি পরীক্ষা প্রক্রিয়ার পদ্ধতির সংস্কার সাধন, ডেটা সুরক্ষা বিধির উন্নতি এবং এন টি এ-র -এর কাঠামো ও কার্যকারিতা নিয়ে সুপারিশ করবে।

৭ সদস্যের এই কমিটির চেয়ারম্যান হলেন ইসরোর প্রাক্তন চেয়ারম্যান এবং আইআইটি কানপুরের বোর্ড অফ গভর্নর্স এর বর্তমান চেয়ারম্যান কে রাধাকৃষ্ণন। আগামী দু'মাসের মধ্যে এই কমিটিকে শিক্ষা মন্ত্রকের কাছে রিপোর্ট পেশ করতে হবে।

\*\*\*\*\*

**PM Vishwakarma Training-Sepahijala :**

প্রধানমন্ত্রী বিশ্বকর্মা যোজনায় সিপাহীজলা জেলার রাজমিস্ত্রীর কাজে যুক্ত ৩৮ জনকে নিয়ে বিশ্রামগঞ্জ আই.টি.আই-এ চলছে সপ্তাহব্যাপী বিশেষ প্রশিক্ষণ শিবির। যোজনাটির জেলা সঞ্চালক ঋদ্ধি দাস জানিয়েছেন গোটা সিপাহীজলা জেলায় এখনো পর্যন্ত

৩৯৬ জন এই প্রকল্পে নাম নথিভুক্ত করেছেন। কম সুদে ও সহজ শর্তে ব্যাঙ্ক ঋণ গ্রহণ সহ প্রকল্পটির মাধ্যমে শুধু রাজমিন্দ্রী বা নির্মাণ শ্রমিকরাই নয়, মোট ১৮টি ক্ষেত্রের কারিগর ও শিল্পীরা বিভিন্ন সুযোগ-সুবিধা গ্রহণ করতে পারবেন। উল্লেখিত অংশের লোকজনদের অবগতির জন্য গত বছর চালু হওয়া কেন্দ্রীয় এই প্রকল্পটির প্রচার সিপাহীজলা জেলাতেও চলছে বলে জানান জেলা সঞ্চালক। আই.টি.আই বিশ্রামগঞ্জের ট্রেনিং ইনচার্জ প্রণয় ভৌমিক বলেছেন। প্রশিক্ষণ শেষে অংশগ্রহণকারীদের ১৫ হাজার টাকার টুলকিট ও শংসাপত্র প্রদান করা হবে। উন্নত যন্ত্রপাতি ব্যবহার করে প্রশিক্ষণার্থীদের পেশাগত দক্ষতা কিভাবে আরো বৃদ্ধি করা যায়, তার প্রশিক্ষণই প্রদান করা হচ্ছে এই শিবিরে। এতে যথেষ্ট লাভবান হবেন নির্মাণ শ্রমিক তথা রাজমিন্দ্রীরা।

\*\*\*\*\*

#### **Felicitation :**

রাজ্যের যুব বিষয়ক ও ক্রীড়া দপ্তরের মন্ত্রী টিংকু রায় আজ কৈলাশহরের শ্রীরামপুর স্বামী বিবেকানন্দ ভবনে কৃতি ছাত্র-ছাত্রীদের সংবর্ধনা অনুষ্ঠানের উদ্বোধন করেন। ভারতীয় জনতা যুব মোর্চার চন্ডীপুর মন্ডল কমিটি "নব স্বপ্নের উড়ান" শীর্ষক অনুষ্ঠানের আয়োজন করে। চন্ডীপুর বিধানসভা কেন্দ্রের অন্তর্গত স্কুলগুলো থেকে এবছর মাধ্যমিক ও উচ্চ মাধ্যমিক পরীক্ষায় প্রথম ও দ্বিতীয় বিভাগে উত্তীর্ণদের সংবর্ধনা জানানো হয়। তাদের প্রত্যেকেই শংসাপত্র ও স্মারক তুলে দেওয়া হয়। উদ্বোধকের ভাষণে মন্ত্রী টিংকু রায় বলেন, জীবনে চলার পথে ধৈর্য্য ও পরিশ্রম করলে সফলতা আসে। তিনি বৃত্তিমুখী পড়াশোনার উপর গুরুত্বারোপ করেন। অনুষ্ঠানে বি,জে,পি'র রাজ্য কমিটির সদস্য

বিমল কর, যুব মোর্চার প্রদেশ মুখপাত্র অল্লান মুখার্জি, যুব মোর্চার মন্ডল সভাপতি বাবলু দেব প্রমুখ ভাষন দেন।

\*\*\*\*\*

### **Jagannath Snan Yatra :**

আজ ভগবান জগন্নাথ দেবের স্নানযাত্রা উৎসব। আগরতলার জগন্নাথ জিউ মন্দিরসহ বিভিন্ন জগন্নাথ মন্দিরে ধুমধামের সঙ্গে ধর্মীয় আচার অনুষ্ঠানের মধ্যে দিয়ে স্নানযাত্রা উৎসব আয়োজিত হয়। আগরতলার জগন্নাথ জিউ মন্দিরে ভগবান জগন্নাথ, বলভদ্র, শুভদ্রা দেবীকে বিশেষ উপাচারে স্নান করানো হয়। স্নানযাত্রার পর জগন্নাথ বলভদ্র শুভদ্রা দেবীর বিগ্রহ সাধারণ লোক চক্ষুর আড়ালে বিশেষ ঘরে স্থাপনা করা হয়েছে। আগামী ৭ই জুলাই রথযাত্রা উৎসব পর্যন্ত এই ঘরেই রাখা হবে। এই সময়কে বলা হয় অনবসর কাল। স্নানযাত্রা উপলক্ষে এখানে মেলাও বসেছে। আগরতলার ইসকন মন্দির, উদয়পুরের জগন্নাথ মন্দিরেও উৎসাহ উদ্দীপনার মধ্যে দিয়ে স্নানযাত্রা উৎসব পালন করা হয়।

\*\*\*\*\*

### **Snan yatra-Baikhora :**

আজ সকাল ১০টায় ধর্মীয় আচার মেনে দক্ষিণ জেলার বাইখোড়ায় ইসকন পরিচালিত জগন্নাথ মন্দিরেও হয় স্নানযাত্রা। দক্ষিণ জেলার জেলা শাসক সিদ্ধার্থ শিব জয়সওয়াল, বাইখোড়া ইসকনের প্রধান পরিচালক করুনেশ্বর মাধব দাস ও অগনিত ধর্মপ্রাণ মানুষ স্নানযাত্রার অনুষ্ঠানে অংশ নেন।

\*\*\*\*\*

**Ratan Chakraborty :**

আগামী ১৪ই জুলাই থেকে খয়েরপুরের পুরাতন হাবেলিতে চৌদ্দ দেবতা মন্দিরে ঐতিহ্যবাহী খাচী পূজা ও মেলা শুরু হচ্ছে। মেলা কমিটির চেয়ারম্যান বিধায়ক রতন চক্রবর্তী জানান, ৭ দিনব্যাপী এই উৎসবকে ঘিরে নিশ্চিত নিরাপত্তা ব্যবস্থা গ্রহণ করা হবে। পূন্যার্থীদের যাতায়াতের জন্য পর্যাপ্ত যানবাহন থাকবে। আলোকসজ্জা থেকে শুরু করে উৎসবকে সুন্দর করে তোলার জন্য সব ধরনের ব্যবস্থা গ্রহণ করা হবে।

\*\*\*\*\*

**Ambubachi :**

আসামের কামাখ্যা মন্দিরের অম্বুবাচী পূজার সঙ্গে রাজ্যেও বিভিন্ন মন্দিরে অম্বুবাচী পূজা ও মেলার আয়োজন করা হয়। এই উপলক্ষে আগরতলার লক্ষ্মী নারায়ন মন্দিরেও অম্বুবাচী মেলার আয়োজন করা হয়েছে।

\*\*\*\*\*

**DM West press :**

পশ্চিম জেলার জেলাশাসক ডা: বিশাল কুমার আজ আগরতলায় সাংবাদিকদের জানান, জমি সংক্রান্ত মামলার জন্য এখন থেকে প্রত্যেক শনি ও রবিবার জেলা শাসকের কার্যালয়ে রাজস্ব আদালত বসবে। যাদের জমি সংক্রান্ত সমস্যা রয়েছে তারা সমস্যার সমাধানের জন্য এই আদালতে আপিল করতে পারবেন। তিনি আরো জানান, বর্তমানে প্রায় তিন হাজার রাজস্ব সংক্রান্ত মামলা রয়েছে। এই মামলাগুলো দ্রুত নিষ্পত্তি করার জন্য বিশেষ রাজস্ব আদালতের আয়োজন করা হয়েছে। আজ বিশেষ রাজস্ব আদালতে

সর্বমোট ৪০টি মামলা ছিল। এর মধ্যে ৩০টি মামলার নিষ্পত্তি হয়েছে।

\*\*\*\*\*

#### **Amarnath Yatra :**

জম্মু ও কাশ্মীরের উপ-রাজ্যপাল মনোজ সিনহা জানিয়েছেন, এ বছরের অমরনাথ যাত্রা শুরু হবে আগামী ২৯ জুন, শেষ হবে ১৯শে আগস্ট। তিনি আজ অমরনাথ যাত্রার 'প্রথম পূজো' করেন। আজ সকালে শ্রীনগরের রাজভবন থেকে ভার্চুয়ালি মাধ্যমে অমরনাথ যাত্রার 'প্রথম পূজো'-তে অংশ নেন তিনি।

\*\*\*\*\*

#### **GST Meeting :**

কেন্দ্রীয় অর্থমন্ত্রী নির্মলা সীতারমণ আজ নতুন দিল্লিতে পণ্য পরিষেবা কর পরিষদ-জিএসটি কাউন্সিলের ৫৩তম বৈঠকে পৌরহিত্য করেন। তাছাড়া কেন্দ্রীয় অর্থমন্ত্রী আজ দেশের সমস্ত রাজ্য ও কেন্দ্রশাসিত অঞ্চলের অর্থমন্ত্রীদের সঙ্গে প্রাক বাজেট আলোচনা করেন। চলতি অর্থবছরের পূর্ণাঙ্গ কেন্দ্রীয় বাজেটের জন্য রাজ্যগুলি অর্থমন্ত্রীদের কাছ থেকে তিনি মতামত গ্রহণ করেন।

\*\*\*\*\*

#### **Yoga-South :**

দক্ষিণ জেলার প্রতিটি উপস্বাস্থ্য কেন্দ্রে জুলাই মাস থেকে শুরু হবে যোগা অনুশীলন। প্রতিটি উপ-স্বাস্থ্যকেন্দ্রে সপ্তাহে ২ দিন যোগা অনুশীলন হবে বলে জানিয়েছেন দক্ষিণ জেলার মুখ্য স্বাস্থ্য

আধিকারিক ডা: সুব্রত দাস। দক্ষিণ উপস্বাস্থ্য কেন্দ্রগুলিতে যোগা অনুশীলনের জন্য এখন পর্যন্ত ১৯ জন যোগা প্রশিক্ষককে নিযুক্ত করা হয়েছে।

\*\*\*\*\*

#### **IPFT Conference :**

আজ আগরতলার দশরথ দেব ভবনে আই পি এফটির দলের একদিনের সম্মেলন অনুষ্ঠিত হয়। উপস্থিত ছিলেন সংখ্যালঘু উন্নয়ন মন্ত্রী শুক্লাচরণ নোয়াতিয়া, আইপি এফটি দলের সভাপতি প্রেম কুমার রিয়াং, সাধারণ সম্পাদক স্বপন দেবর্মা প্রমুখ। সম্মেলনে দলের সাংগঠনিক কর্মসূচি সহ আসন্ন পঞ্চায়েত নির্বাচনের রণকৌশল নিয়ে আলোচনা হয়।

\*\*\*\*\*

#### **Health and Eye Camp :**

আজ আগরতলার মঠচৌমুনীস্থিত ফ্লাওয়ার্স ক্লাবে বিনামূল্যে স্বাস্থ্য ও চক্ষু শিবির অনুষ্ঠিত হয়। শতাধিক রোগী এই পরিষেবা গ্রহণ করেন। স্বাস্থ্য শিবিরে উপস্থিত ছিলেন আগরতলা পুর নিগমের কর্পোরেটর সুখময় সাহা।

\*\*\*\*\*

#### **Maan Ki Baat :**

তৃতীয়বারের মত প্রধানমন্ত্রীর পদে দায়িত্বভার গ্রহণের পর প্রধানমন্ত্রী নরেন্দ্র মোদী আগামী ৩০শে জুন আকাশবানীর মন-কি-বাত অনুষ্ঠানে দেশ বিদেশের জনগণের সাথে মত বিনিময় করবেন। এটি হলো মন-কি-বাত অনুষ্ঠানের ১১১তম পর্ব। জনগণ

মন কি বাতের জন্য ভাবনা-চিন্তা ও পরামর্শ টোল-ফ্রী ১৮০০-১১-৭৮০০ নম্বরে শেয়ার করতে পারেন। এছাড়া নরেন্দ্র মোদী অ্যাপ অথবা মাইগভ ওপেন ফোরামে জমা দিতে পারেন। আগামী ২৮শে জুন পর্যন্ত এইসব পরামর্শ গ্রহণ করা হবে।

\*\*\*\*\*

#### **Update Akashvani :**

শ্রোতাবন্ধুরা, আকাশবাণীর সংবাদ সহ বিবিধ খবরের বিস্তৃত আপডেট পেতে লগ ইন করুন - ডব্লিউ, ডব্লিউ, ডব্লিউ ডট, নিউজ অন এআইআর ডট কম ও নিউজ অন এআইআর অ্যাপ, এবং টুইটার অর্থাৎ এক্স প্ল্যাটফর্মে। আপডেট পেতে দেখুন আকাশবাণী নিউজ আগরতলা / ফেসবুকে এআইআর নিউজ আগরতলা এবং ইউ টিউবে এআইআর নিউজ আগরতলা।

\*\*\*\*\*

#### **Weather :**

আগামীকাল আকাশ সাধারণত মেঘাচ্ছন্ন থাকবে। দুয়েক জায়গায় বজ্র বিদ্যুত সহ হালকা থেকে মাঝারি পর্যায়ে বৃষ্টিপাতের সম্ভাবনা রয়েছে। আগামীকাল তাপমাত্রা সর্বোচ্চ তেত্রিশ ডিগ্রী এবং সর্বনিম্ন ছাব্বিশ ডিগ্রী সেলসিয়াস এর কাছাকাছি থাকবে। আজ দিনের সর্বোচ্চ তাপমাত্রা ছিল চৌত্রিশ দশমিক চার ডিগ্রী এবং সর্বনিম্ন ছাব্বিশ দশমিক ছয় ডিগ্রী সেলসিয়াস। আগামী চব্বিশ ঘণ্টায় রাজ্যের সব জেলায় বিক্ষিপ্তভাবে বজ্র বিদ্যুত সহ বৃষ্টিপাতের সতর্কতা জারি করেছে আবহাওয়া দপ্তর।

\*\*\*\*\*

## Women's Football :

একদিনের বিরতির পর মহিলাদের ঘরোয়া ফুটবল লিগের খেলা আজ ফের অনুষ্ঠিত হয়। উমাকান্ত মিনি স্টেডিয়ামে সকালে অনুষ্ঠিত খেলায় জম্পুইজলা প্লে সেন্টার ৭-০ গোলে চলমান সংঘকে পরাজিত করে। বিজয়ী জম্পুইজলার পক্ষে সুয়ারী দেববর্মা ও পাখিলা বোরো দুজনেই দুটি করে এবং সুনালী দেববর্মা, জিবিকা দেববর্মা ও কবিতা দেববর্মা একটি করে গোল করে।

\*\*\*\*\*

## Third Division League :

ঘরোয়া তৃতীয় ডিভিশন লিগ ফুটবল প্রতিযোগিতার দুটি খেলায় আজ জম্পুইজলা প্লে সেন্টার ও ইকফাই ফুটবল ক্লাব জয়লাভ করেছে। উমাকান্ত মিনি স্টেডিয়ামে অনুষ্ঠিত খেলায় জম্পুইজলা ২-১ গোলে আনন্দ ভবনকে পরাজিত করে। বিজয়ী জম্পুইজলার পক্ষে সুখদয়াল দেববর্মা দুটি গোল করে। অপরদিকে আনন্দ ভবনের পক্ষে একমাত্র গোলটি করে নয়ন বাহাদুর মলসুম। একই মাঠে অপর খেলায় ইকফাই ৮-০ গোলে সবুজ সংঘকে হারিয়ে দেয়। ইকফাই-এর পক্ষে অনিমেঘ দেববর্মা হ্যাটট্রিক করে। এছাড়া সাচলাং জমাতিয়া দুটি, বিলাশ দেববর্মা, খাচাং জমাতিয়া ও রকেশ জমাতিয়া একটি করে গোল করে।

\*\*\*\*\*